



新畫山脈圖志

ル 5
3546
2



門 5
號 3546
卷 2



新疆山脈圖志卷二

新城王樹枏

天山二

又東北曰瑚木爾里克之山有水焉東南流入於庫克
墨爾根是為瑚瑪拉克河

勘界日記由薩瓦巴齊卡倫取道瑚瑪拉克河西
北行百里至瑚木爾里克山口

案西域圖志特木爾烏蘇郭勒源出庫克墨爾
根郭勒西一百里北山下東南流入呼木阿里
克郭勒呼木阿里克郭勒在阿克蘇城西二十

里承庫克墨爾根特木爾烏蘇二水合而南流
支派非一並入托什干達里雅以日記證之圖
志之特木爾烏蘇卽瑚木爾里克圖志之呼木
阿里克卽瑚瑪拉克也

又東北曰薩瓦布齊之山其陽庫克墨爾根之水出焉
是爲阿克蘇河東源有鳥焉厥狀如鶉名曰岔口窺其
觜距千百爲友遺卵冰上遇寒而剖翩翩飛去於凌之
首

西域圖志薩瓦布齊鄂拉在木素爾鄂拉西南三
百里圖斯庫勒南阿克蘇北庫克墨爾根郭勒發

源南麓山脈自喀克沙勒鄂拉東北行二百三十
里爲伯得里克鄂拉又東北二百四十里爲卓哈
達巴又東二百里至此岡嶺層沓綿亘東北境凡
七百里唐書西域傳云漢姑墨國西三百里度石
磧至凌山葱嶺北原也水東流冬夏山皆積雪又
稱自龜茲羸六百里有跋祿迦一曰亟墨卽漢姑
墨國又三百里至凌山是凌山在龜茲西九百里
也今薩瓦布齊山在庫車西北七百里似所謂凌
山尙在其西然考唐書又云凌山西北五百里至
素葉水城在今圖斯庫勒西則唐之凌山又當在

今圖斯庫勒之南與薩瓦布齊之方位適合更以東西七百里中大局考之東爲木素爾郭勒西爲托什干達里雅皆出北山麓而東流自木素爾鄂拉以西嶺多雪難行皆與唐書水東流冬夏積雪者相合是唐書之凌山卽不定薩瓦布齊山亦必在薩瓦布齊迤西一帶自庫車西行九百里之間也

案薩瓦布齊中俄圖約作薩瓦巴齊指山爲界西域水道記云阿克蘇河東支發楚克達爾山爲瑚瑪喇克河南流八十里有陽那哈克河自

阿克蘇城北六泉並發同南流來滙由阿克蘇西行者亂茲二水以渡案勘界日記分圖庫庫河發源於薩瓦布齊山東南流會瑚木爾里克水爲瑚瑪拉克河其東則烏西拉克山陽那哈克河水所出也據此則薩瓦布齊又名楚克達爾矣楚克達爾其音又變爲庫克墨爾根新疆圖說之楚克達爾河卽庫克墨爾根河庫庫又屬西南巧塔爾達坂及賽里木所屬之阿爾通霍什均爲赴伊犁捷徑巧塔爾卽楚克達爾之

轉音

烏西拉克山陽那哈克之水出焉南流入於瑚瑪拉克河

案烏西拉克山在溫宿城北為薩瓦布齊山南出分支沙大臣勘界日記作博斯塔克山

帖列嶺

案帖列嶺在溫宿城北薩瓦布齊卡之西卡南距城二百四十里陽那瓦克河逕其北

克子里坦嶺

案克子里坦嶺在溫宿城北帖列之南

松山特朗水出焉

新疆圖說特朗水源出溫宿城東北松山南流一

百里至札木驛

驛西距城八十里

折而西南流六十里至阿

吉里克分蔭白爾滿莊黑子爾莊鐵列克莊阿吉

里克莊諸地

意什哈子山

案意什哈子山在溫宿城東北松山之東

庫魯克均山

溫宿府鄉土志阿音柯莊西行八十餘里與烏什交界處有庫魯克均山山脈發自葱嶺袤延烏什

而入本境盤亘三四十里山北距瑚瑪喇克河約
百里山勢漸平

案新疆圖說云阿音柯莊卽愛柯爾在溫宿州
府今改城南一百二十里

中博克山

案中博克山在溫宿府城西南齊蘭台驛西北
山南有謙灘山北有草灘

空潭山齊蘭水出焉

新疆圖說空潭山在溫宿城西南五百四十里齊
蘭水出空潭山陝中南流二十里至克子科卡倫

在城西南五百二十里

折而東南流四十里經柯爾坪莊南折
而東北流五十里分二支一東流五十里入黃草
湖其正枝東流一百六十里入齊蘭草灘

案空潭山西南與烏什巴楚界柯爾坪卽今之
柯坪也

谷故提山

新疆圖說谷故提一作谷布的山在溫宿城西南
四百二十里

案谷故提在空潭山東齊蘭水之南今歸柯坪
鐵克列克塔哈山

柯坪鄉土志本境西北重巖疊嶂同人呼鐵克列
克塔哈山其脈發自葱嶺袤延喀什噶爾而入柯
坪綿亘二百餘里

礪山

柯坪鄉土志礪山在柯坪南橫亘七十餘里礪苗
甚旺

已上溫宿境內支山

又東北曰木素爾之山廣員二百里其上多千年之冰
冰橋之下厥爲雪海有鳥焉如鵬而蒼白名曰神鷹聞
之已迷有獸焉非狼非狐名曰導途之獸木札拉提之

水出焉西流折而東南入於渭干河

西域圖志木素爾舊音穆薩爾在汗騰格里鄂拉
西南四百里圖斯庫勒南拜城北哈喇烏蘇哈布
薩朗郭勒發源東南麓木素爾郭勒兩源皆出其
南麓綽爾噶布拉克都楚特郭勒阿察哈喇郭勒
出其西山脈自西三百里之薩瓦布齊鄂拉東行
至此峰巒峻拔冰雪嵯峨艱於行旅自鄂拉北東
北行通伊犁乾隆二十五年秩於祀典每歲春秋
致祭

新疆識略木素爾達巴譯言冰嶺也自噶克察哈

爾海臺行二十里至冰嶺嶺長百里爲堅冰結成
間以巨石冰復拆裂其下無底登陟必由冰梯其
梯移徙無常高卑不定冬夏積雪無鳥獸草木每
年回子運送布疋皆由此路險滑萬狀徧山皆馬
骨焉案冰嶺不見於漢書惟唐書西域傳云姑墨
國西二百里度石磧至凌山葱嶺北原也又云凌
山冬夏積雪春秋含凍雖時消泮尋復結冰考周
禮掌冰者謂之凌人藏冰之室謂之凌陰古人多
謂冰爲凌是凌山卽冰山矣云葱嶺北原者冰嶺
爲喀克善山支峰喀克善山卽葱嶺也又按漢書

元帝建昭三年副校尉陳湯矯制發兵引兵分行
別爲六校其三校從南道踰葱嶺經大宛其三校
都護自將發溫宿國從北道入赤谷過烏孫涉康
居當時由溫宿至烏孫卽是由阿克蘇至伊犁或
取道於此

回疆風土記穆肅爾譯言冰達坂譯言山穆肅爾
達坂譯言冰山也在伊犁烏什之間爲南北兩路
必由緊要之孔道其北爲克噶察哈爾海臺南爲
他木哈他什臺兩臺相距百二十里中卽冰山由
克噶察哈爾臺南行有雪海一望無際冬雪極深

夏亦冰雪泥淖人畜皆於山坡側嶺羊腸曲徑而過失足落海中則杳然沈墜不復可見過此二十里卽冰山矣無土沙無草木在在皆冰冰之厚薄初不知其幾何尋丈層巒疊嶂千仞攢空巉巖如嵩華者皆冰也裂隙處下視正黑不見其底水流之聲澎湃如雷鳴人聚駝馬之骨橫布其上乃可置足陡絕處亦鑿有冰磴陟降攀援滑險萬狀跬步不謹輒落冰澗中時聞冰裂其聲琅然山谷相應經其地者人畜魚貫而行莫不惴慄冰上皆石塊石子小者如拳如栗大者如屋如樓往往有數

丈大石惟徑尺冰柱支撐而立人必於其下往來設中途日暮暗不能行須擇穩厚大石伏於其上夜靜聞有如鈺鐃鐘鼓之聲絲竹管絃之奏通宵聒耳則遠近冰裂之繁響也其冰亦長落無常時或突起則高三五百丈或時沈陷則下三五百丈道路亦無一定之所有神獸一非狼非狐每晨視其蹤之所往踐而循之必無差謬有神鷹一其大如鷗色青白或有迷失路徑者輒聞鷹鳴尋聲而往卽歸正路益西山峰矗起林立如筍望之深青不可登陟矣八十里之他木哈他什臺河流浩漭

即冰山湧出之水也東南長流五千餘里支分派別盡歸賀卜諾爾自他木哈他什臺南行四日皆戈壁無水草近台八九十里大石嶙峋徧滿路衢牲畜皆於石隙置足每歲烏什參贊大臣遣官致祭冰山一次祭文由禮部頒出岔口烏即產於此山

西域水道記木素爾嶺回語木素爾冰也言爲冰

結成按明華夷譯語冰曰莫勒孫即木素之轉音

車登三不勒傳附車凌巴勒傳乾隆二十年六月霍集斯禽

獻達瓦齊偕副都統額爾登額以兵五百由木素

爾嶺往取械達瓦齊詣軍山脈來自西三百里之薩瓦布齊山亦喀客善山支峰故唐書以爲葱嶺北原嶺長百里高百餘丈堅冰結成層巒疊嶂高下光瑩冰有三色一種淺綠一種白如水晶一種白如硨磲嘉慶二十一年正月五日黎明自噶克察哈爾海軍臺在伊犁沙圖阿璦軍臺南百里行二十里至山麓朝日始升據鞍魚貫如緣螺殼天風橫吹飛沙擊面寒砭肌骨噤不出聲冰每圻裂寬或近尺塞馬骨作橋上嶺數里度雪海周三四里一綫危徑界海正中劣裁容馬若逢巽二震怒滕六肆虐神鷹不飛

冰嶺遇風雪迷道有一神鷹飛鳴隨其所向覓路乃得出迷途坐困杜環經行記云從安

西今庫車地唐置安西都護府西北行千餘里有勃達嶺又北行數

日度雪海海在山中春夏常雨雪故曰雪海有細

道道旁往往有冰孔嵌空萬仞轉墮者莫知其數

即其地矣嶺中又有二池周各十許丈在冰不冰

淵然澄澈其熱海之傳歟嶺端夏日消釋氾濫四

出冬復增高冰中時函馬骨又含巨石如屋及其

融時冰細若臂銜石於巔柱折則摧當者糜碎辨

機西域記云跋祿迦國西北行三百餘里度石積

至凌山詩納于凌陰傳曰凌陰冰室也周官掌冰者曰凌人是知凌即冰說文作積引詩納于凌陰此則葱嶺

北原水多東流矣山谷積雪春夏含凍雖時消泮

尋復結冰經途險阻寒風慘烈多暴龍難陵犯行

人由此路者不得赭衣持瓠大聲叫微有違犯災

禍目覩暴風奮發飛沙雨石遇者喪沒難以全生

余按辨機之言斯為不虛惟衣赭持瓠之忌今則

不爾行五十里許展敬於同人馬唯爾乾隆二十五年四月上諭舒

赫德奏稱過木素爾嶺下至山麓有澗名塞塞克愛噶爾雅勒其險處約四十餘里一值風雪即難行走必須住候晴霽從前準噶爾於其地樹幡誦經

致祭今四月初旬遞送事件兵丁有凍斃者酌於附近之克斯地方造屋以資避禦等語木素爾嶺為往來要路今山澗險阻猝遇風雪人力難施蒙古

風俗俱誦經致祭著傳諭舒赫德如同人內有善於禱禱者令其虔誠將事或無其人即遣厄魯特人致祭乃下冰梯梯

寬二尺冰消長無定梯亦因之增損鑿梯者曰達

巴齊凡七十戶

乾隆二十五年上諭舒赫德奏由木素爾嶺行走四十餘里地多冰石相雜內有二里全係冰山滑不

可行每日派回人十名鑿鑿磴道等語木素爾嶺係往來要路既係冰堅難鑿十人之力恐不敷用舒赫德應多派回人前往專責以修治道途冰雪之役行走人多地氣漸就和暖則凝沍自易消融又四十餘里下嶺始盡乾隆二十

五年秩於祀典春秋祭之

乾隆二十五年十月舒赫德奏言臣等於九月二十五日致祭木素爾嶺

先三日天氣晴和本日風霧盡斂日色昭朗官兵回人等俱驚異歡悅臣察勘木素爾嶺形勢由山陽之阿爾巴特阿瑞入口兩面俱是高峰峰中匯大河由山崖行百八十里至塔木噶塔什軍臺即山嶺之足初入嶺口繞行冰石相雜之地二十里一山橫亘盡屬堅冰臣即將派出修道路回人一百二十戶內每日派二十人更番推鑿過此地復冰石相雜約六七十里至噶克察爾海軍臺山陰積雪柴薪甚乏嶺下洪流

噴薄厥聲殷雷色如米汁諺曰白龍口又西行里

許為塔木噶塔什軍臺後山尤險惡不通徑路

巨臺之右於臺西五里許湧泉如墨諺曰黑龍口

二水交匯於軍臺南是為木素爾河乾隆二十一

年定邊右副將軍兆公惠奏言副都統阿敏道聞

九月初五日帶兵將至庫車城探知阿克蘇城之

阿布塞塔爾率眾一千人往木素爾河即此河也

是為渭干河西源

勘界日記光緒八年七月十九日由納林郭勒向

東行至木素山口即修梯口計程六十里水源自

冰嶺彎環而下北出口名木素河二十日向南

行六十里駐阿東噶爾臺二十一日向南行六十

里駐黃沙河亦名噶克察爾海臺道路難行窄

山脈二
處巉巖怪石迎面森立激湍鳴沸響蒼林谷松柏
生石隙蟠踞得勢凌空峭壁上有小峰如插望之
嶒峻有致午後飛雪至夜漸大二十三日向南行
六十里至天山頂百盤九折草木不生積雪滿山
凝冰瑩晶下數武頗平有冰池涵水一泓又西南
三數里卽所謂冰嶺者也周圍山環二百餘里堅
冰凝結成塊其形磷磷然纍纍然如牛羊起卧山
中縱橫莫可指數人行處勢若龍脊蜿蜒上浮生
碎石如鋪馬蹄踏觸冰出則滑不可支道旁冰柱
高尺許上擎磐石甚巨亦甚怪冰澗滄滄深不測

底循聲俯聽疑有魚龍又南七八十里冰坎深邃
形如架樑此冰橋也其下有潭千尺厥曰雪海過
此數里冰峰六七參差排列從中鑿冰爲級人馬
踉蹌而下若稍失足直落澗底甚可畏矣下行三
十餘里溪出冰坎之下水向南流左右夾山成河
厥冰雖盡其山尙遠晚霞返照四圍空明計程百
八十里駐塔木哈塔什臺二十四日由塔木哈塔
什向東南順澗水行五十里二十五日渡河西岸
行五里緩住兩岸多草枯蘆斷梗可炊山勢仍壁
立中有澗溪南流地名克音拉克臺二十七日順

澗向東南行四十里兩山夾水路多爛石觸礙馬蹄地名圖巴拉克臺二十八日向東南行住可力峽齊山砌墻絕勝關隘計程六十里有南路馬撥稽查局山產玲瓏小石色如靈璧其質瑩皺水至此出口南流二十九日由可力峽向西南行二十里過良噶爾始出冰山口又二百三十里至阿克蘇回城

冰橋道里記溫宿至札木台一百里均係大路札木台至鹽山口八十里均平路行車鹽山口至可力峽一百里中隔山石一座不甚高峻餘均平路

通車中有大河一道可力峽至圖巴拉特六十里中隔橫流水溝三道半山斜險石路二十里餘均平路圖巴拉特至瑚斯圖托海四十里均亂石險途瑚斯圖托海至塔木哈塔什八十里途中亂石大河水溝甚多無好路塔木哈塔什至黃草湖驛一百八十里冰路一百里中有冰梯雪路三十里上山脊三十里平路二十里此站長且險黃草湖驛至阿仁墩六十里均樹林路勢稍斜好走阿仁墩至杓梯六十里均走樹林路勢斜中有石斫險途約十里許杓梯至特克斯川百里均平路特克

斯川至和樂火依一百四十里均平路中隔特克
斯大河和樂火依至布噶樂一百二十里均平路
山坡不多布噶樂至坎爾一百二十里均有樹木
上山路陡下山稍平坎爾至甯遠八十里均平路
中隔伊犁大河以上由温宿起至甯遠止共計一
十四站一千三百二十里

案渭干西域圖志作烏恰特達里雅達里雅回語謂大河也舊
音鄂根或名渭甘皆音之訛也在庫車西南一
百里爲赫色勒河下流木札拉提西域水道記
作木札特卽穆薩爾之轉音木素爾又穆薩爾

之變字俄圖作莫柴魯託木素爾爲古凌山危
峰沓嶂皆堅冰結成自塔木哈塔什至黃草湖
驛長一百八十里自漢唐以來爲南北往來孔
道同治七年俄人取納林河地完障駐兵造梁

通墩以規取我喀什噶爾英人雜記云一千八百六十八年卽同治七年俄參將來付司喀欲於天山附近之山國主持利權遂據納兩上游築納兩堡開託庫埋庫通喀什噶爾之道用意在進征喀什噶爾一千八百七十二年卽同治十一年俄官以破隊及輜重遠至納兩堡命開關道路兵卒艱苦從事共長九十六買依路司道路橋梁成僅五月自納兩堡達喀什噶爾大凡長一百五買依路司至今車馬通行不爲難事且庫古莫依那庫驛路三冬亦無雪阻之憂故車輛往來通行無礙云案納兩卽納林河也沈曾植云托庫埋庫卽托克瑪克其地在布圖納東吹河南岸西域圖志所謂自薩爾奇門至和爾袞皆准噶爾諸昂吉遊牧者也當時本在界內不知何時棄爲甌脫而木素爾冰嶺一路荒而
自乾隆圖已如此與圖志不合

山脈二

齒

廬

甌脫
胡人據上土當
僕人可同

不治 英人雜記云莫柴魯託山路係連絡伊犁喀什噶爾之地此道有堅冰大野且多深穴高隄為軍隊商人之通路故須多築橋梁平日又需人夫修理若無人經理即便梗塞然伊犁至喀什噶爾山路祇此一條時有大雪阻道沿途設築小屋自回教叛亂以來此道荒廢殆盡 及光緒八年俄人交還伊犁勘界大臣沙

克都林札布等始由木素爾故道勘界豎博於是發民鑿冰梯陵險阻冒不測而絕者復通二十二年復調兵民大治之行旅稱便初同治六年九年之間俄人兩次履勘此山至一萬一千尺不能復進而光緒二年醫官立蓋路復往則云馬行可至一萬二千尺而冰坂記郵刊入墨斯科博物雜誌報中 英人雜記云一千六百六十七年即同治六年扒魯鐵管拉子克初查察莫柴

魯託山路爾時自謂已至極頂其後方知所到僅山腳踵其後者一千八百七十年即同治九年參將皆伊各付司克及男爵枯魯派司亦往查察兩君所至亦止一萬一千尺幸苦萬狀不能更進一步一千八百七十一年即同治十年軍隊長先派來付南經莫柴魯託冰野遠征至天山南麓設立喀什噶爾人營站處止一千八百七十七年即光緒三年伊犁鎮之醫官立蓋路查察莫柴魯託山路騎馬進行高至一萬二千尺立蓋路詳記路程且於莫斯科所刊博物雜誌報中曰特吉斯川水上至山路絕頂之間頗多險惡山南斜面之地稱暗拉隨魯昔年經過頗多困難今變成沙地平易非常一千八百七十九年即光緒五年二月喀什噶爾隊伍商馱載棉花踰山路曾至特吉斯河云又云進莫柴魯託山北口有俄國哥薩克成兵營自兵營至山頂須走兩日云 其後議者以山險費鉅宜

且罷工作於是商旅駝騎出師轉饒由伊犁以趨喀什者始舍冰嶺而西道納林矣然納林在

喀克善 或作善塔斯 之西於俄稱便 此路亦即曩日伊犁兵赴烏什換防之路兆文襄征大小和卓亦由 木素爾在喀克善之東於我為密故俄

據伊犁以窺天山以南其不能不經營納林以扼南北之衝者勢也俄反侵地於我我不能不規復冰嶺故道以求合乎往轍者亦勢也夫亦各圖其利便者而已

新疆南北相通徑路自昔有三而由伊犁東南至喀喇沙爾取道朱勒都斯山等處一路地勢既不適中由伊犁西南至喀什噶爾取道納林河等處一路又已劃歸俄屬惟由伊犁南經冰嶺至阿克蘇為承平時換防官兵往來要道由南路調取回民赴北路屯墾及回民運送布疋皆取道於此

雖然納林一帶昔日皆我疆土當兆文襄征大小和卓時躡青吉之區落振 帝國之天聲威稜所加莫不震疊豈圖異世而後斯拉分之族出乘人之危蕩我邊陲奪攘矯虔狃糠及米

光緒八年勘界失地甚廣

主客強弱之形

一變而成今日之局哉想亦文襄之所不及料也已

又東北曰阿圭雅斯之山阿圭雅斯之水出其北麓北流入於特克斯河

西域水道記阿圭雅斯水發自阿圭雅斯山乾隆二十二年定邊將軍成袞札布奏言臣等自裕勒都斯起程策應明瑞七月初二日明瑞越高嶺數處行兩晝夜至布昆哈瑪爾問知綽和爾等渡庫克烏蘇糾合昂吉岱等盤踞阿圭雅斯山中伏賊於密林以待因遣兵截去路賊見兵勢即逃追至

葉克特里克嶺賊依山結寨石峰林立冰雪堆積
馬乏難行不能奪取暫於明布拉克同語明千數名也地泉多故名駐
劄是知阿圭雅斯河源固林箐阻深矣

哈喇裕勒袁山

西域圖志哈喇裕勒袁塔克在圖格哈納達巴西
南四十五里亦小山也唐書西域傳龜茲國西三
百里石磧案此與圖格哈納南北相屬在庫車西
三百里外庫車爲古龜茲則唐書所載龜茲國西
三百里之石磧當與今哈喇裕勒袁塔克相近又
案東自達爾達巴至此峰巒層疊山北卽裕勒都

斯全境泉源迭發裕勒都斯郭勒在古爲鷹娑川
則此一帶山嶺應屬唐時鷹娑都督府之南屏也
一統志哈喇裕勒袁山在拜城西南

案新疆圖說哈喇玉爾袁驛爲溫宿東站從此
東行九十里入拜城界案哈喇裕勒袁爲溫拜
界上之山驛則設於溫宿也

圖格哈納嶺其上生白鹽

西域圖志圖格哈納達巴在木素爾郭勒西四十
里山脈自天山正榦之薩瓦布齊鄂拉東南行三
百里至此出白鹽色最瑩潔遠近資之

一統志圖格哈納嶺在拜城西南木素爾山之西
榦

卻爾噶山其上多銅

西域圖志卻爾噶塔克在鄂克阿特庫塔克西木
素爾郭勒西南又西與圖格哈納接

一統志卻爾噶在拜城西南

案卻爾噶卽楚午哈之變音又轉爲察爾齊克
西域水道記云上銅廠曰雅哈阿里克廠同語
雅哈邊界也地臨邊界有渠水故名銅產其西
南六十里楚午哈山俗曰滴水崖亦曰察爾齊

克廠下銅廠曰温巴什廠同語十日温頭曰巴
什謂十人之長銅產其南四十里鹽池溝山亦
曰鄂依斯塔克齊克廠向置遊擊一人司之立
錢局焉案今拜城銅礦三所縣屬之西南山均
官地一曰温巴什銅廠距城一百二十里一曰
滴水崖銅廠距城一百六十里一曰克塔一作托和旦
銅廠距城二百五十里產紅銅官督民辦省局
鑄錢全賴此山之銅其質柔粹最爲良美近因
運炭累民丁酉之秋改章令民間舉首人輪流
開辦每歲交銅十萬斤上下滴水崖附近之鞏

伯銅廠暨東北一百二十里之和色爾地方銅
廠均停未辦

鄂克阿特庫山

西域圖志鄂克阿特庫塔克在布里博克濟塔克
西拜城西南木素爾郭勒南岸

一統志鄂克阿特庫山在拜城西南其東北與木
素爾相值

案鄂克阿特庫卽新疆舊圖之阿黑德塔哈爲
溫拜交界

布里博克濟山

西域圖志布里博克濟塔克在賽喇木城南木素
爾郭勒南岸自圖格哈納達巴至此山脈亦自西
而來

明呂山

案明呂山在拜城東南和色爾驛南木札拉提
河與赫色勒河會是爲渭干河

呀色里敏山產鐵鐵廠水出焉南流入於木札拉提
河

案呀色里敏山鐵廠南距拜城一百二十里鐵
廠水亦稱鐵敏水

提札哈依胡山其上多鐵特拉布覺克水出焉南流
入於木札拉提河

案提札哈依胡山鐵廠南距拜城一百二十里
塔爾齊山其上多鐵有水焉南流入於木札拉提河

案塔爾齊山鐵廠在拜城西北一百六十里

楚里塔哈山喀拉蘇特拉布覺克二水出焉東南流
入於木札拉提河

新疆圖說拜城北至楚里塔哈冰山七十里與溫
宿冰達坂連界喀拉蘇河亦名克克蘇河源出此
山東南流一百二十里經布榦莊與木札拉提河

會特拉布覺克河源亦出此山南流一百二十里
經哈拉烏于魯克莊亦入於木札拉提河

明布拉克山產鐵

案明布拉克山鐵廠西南距拜城二百三十里
以上四山之鐵均民間私採

阿勒坦呼蘇山赫色勒水之西源出其南麓

西域圖志阿勒坦呼蘇鄂拉在額什克巴什鄂拉
西一百餘里赫色勒郭勒西一源出其南麓山脈
自木素爾鄂拉東南行百餘里至此爲賽喇木之
北屏

西域水道記定邊將軍兆公惠之自協理庫車赴阿克蘇也奏言臣與雅爾哈善進兵夾攻行至阿勒坦呼蘇嶺雪盛路險臣與官兵等牽馬步行兩晝夜足知其形勢矣

案阿勒坦呼蘇卽阿爾通伙什音之轉也新疆圖說阿爾通伙什卡在拜城東北二百五十里卡在山南西域水道記又作阿勒坦和碩乾隆二十四年護軍統領努三奏云阿勒坦和碩嶺在木素爾額林哈畢爾噶兩山梁之間夏令尙有積雪是也

阿克嶺伯什克勒克之水出其南麓

新疆圖說伯什克勒克水源出阿克達坂西流一百七十里至伯什克勒克卡出峽南二十里折而東南流至尼札爾卡與和色爾河會

案阿克嶺在拜城東北大達巴尼嶺之西其北與甯遠界

額什克巴什山是山也常有火多硫磺銅鐵鳥多孔雀獸多麋良馬羣牛多藥草側柏黃連麻黃甘草雪蓮夏枯草蟲草之屬赫色勒之水有三源焉其二源則茲山之所出也東南之麓哈喇之水出焉

西域圖志額什克巴什鄂拉在汗騰格里鄂拉南
二百里山形寬廣產硫磺哈喇庫勒發源東南麓
赫色勒郭勒東一源出西南麓又東一源出南麓
是山爲庫車北屏距庫車城百里山脈自木素爾
鄂拉分支東南行百餘里爲阿勒坦呼蘇鄂拉至
此北與汗騰格里鄂拉合又東行一支接庫克納
克達巴魏書西域傳龜茲國西北大山中有如膏
者流出成川行數里入地如飴餈甚臭服之髮齒
已落者能令更生病人服之皆愈隋西域傳白山
一名阿羯山常有火及烟卽是出礪砂之處唐書

西域傳伊邏羅城北依阿羯田山亦曰白山常有
火案今庫車古龜茲地伊邏羅城唐龜茲國王居
之則今庫車城北之額什克巴什鄂拉應卽唐書
龜茲國北之阿羯田山隋西域傳所稱阿羯山也
史稱阿羯田山出礪砂今額什克巴什鄂拉產硫
黃本草硫黃一名黃礪砂而字書無礪字疑礪砂
卽礪砂若魏書所云膏流如川能令齒髮更生愈
病者今不可考矣

水經注屈茨卽龜茲北二百里有山夜則火光晝日
但煙取此山石炭冶此山鐵恒充三十六國用

訊鮮錄礪砂山在城北百餘里山皆培塿多石洞
礪砂產洞中形如鐘乳

案額什克同語謂小山羊也巴什謂頭言山形
似羊頭也阿羯山蓋取此義新疆圖說云和色

爾即赫色勒

河其源出拜城東北四百五十里之大

達巴尼嶺

嶺與伊犁屬額魯特上三旗六蘇木遊牧提尼地方連界

西流三十里至伯

什克擺草場又西流一百六十五里至阿爾通

伙什

即阿勒坦呼蘇

卡折而南流四十里至尼札爾卡又

西南流至和色爾驛折而南流二十里至明呂

山口與渭干河會伯什克擺即額什克巴什東

北距大達巴尼嶺三十里蓋一山也其山在庫
車之北拜城東北為兩地公共之山礪砂今產
山之培塿多石硎處質最佳春夏秋山硎中皆
火望之如萬點星光人不可近冬日極寒時大
雪火熄土人往取砂赤身而後入砂結硎中如
鐘乳每次所獲不多故難得也

已上拜城境內支山

又東北曰汗騰格里之山特克斯河水出於其陰東流
三百餘里折而西以注於伊犁之河其上多孔雀羣牛
獼鹿

西域圖志汗騰格里鄂拉在納喇特達巴西五百里特克斯郭勒發源北麓東北距伊犁一百五十里南距庫車三百里山脈自西南四百里之木素爾鄂拉東行分二支其北一支由圖斯庫勒東南折而東北至特克斯郭勒源南其南一支自拜賽喇木庫車之北折而北行逾西裕勒都斯郭勒發源處與北一支合汗騰格里當其交會處山勢尊嚴羣巒環拱爲天山之主峰一統志汗騰格里山在庫車北其北境當伊犁之西南卽天山也峰勢尊嚴羣巒環拱爲一方之巨鎮

勘界日記光緒八年八月二十五日俄使與商輕騎減從返轡東行馳勘罕騰格里山二十九日由薩瓦巴齊卡倫順山腳北行數里舊有安夷卡倫頗爲扼要今若置兵斥埃險爲我有計程百八十里三十日北行八十里至罕騰格里山腳仰視山頂其高無極幾欲登臨四尋無路因從俄使議照約指山爲界直從天山中梁劃分

庫車鄉土志城北皆山自迤西千佛洞山勢拗折蜿蜒東趨綿亘全境北岸達坂名稱各異統爲汗騰格里山卽自葱嶺來之北山西接阿克蘇之木

素爾嶺東達布告爾之博羅圖山

案準語謂君爲汗謂天爲騰格里言天山也顏師古注漢武帝紀云天山卽祁連匈奴謂天爲祁連案匈奴傳云匈奴謂天爲撐犁祁連者撐犁之轉音今蒙古語曰騰格里騰格里卽撐犁之變字也此古語之存於今者唐書西突厥傳初曷薩那朝隋被留不遣乃共立達頭號射匱可汗建廷龜茲北之三彌山玉門以西諸國多役屬與東突厥亢西域圖志云龜茲爲今庫車迤北諸山汗騰格里爲大應卽唐時三彌山射

匱可汗當建廷山北也案賽喇木爲龜茲國地賽喇木卽三彌之轉音當時建廷蓋依賽喇木北山當木素爾山之地不必定論山之大小也甯波龔柴云騰格里崇巖峻嶺上插雲霄橫亘數十里最高者得一千八百二十丈中有火山高約三百二十丈徐松謂汗騰格里非漢書之所謂天山而以博羅圖當之不知博羅圖乃天山之支峰古人統謂之天山耳鄒氏約說云界自汗騰格里山巔順支阜而下南偏西三十六度迤八十二里又轉而南偏東四度迤二十里

又轉而西偏南三十六度迤八十里爲阿克蘇
河入界處又西偏南十一度迤八十里爲札那
爾特河入界處又西偏南三十四度迤二十八
里爲喀伊車山口

戈達朗嶺廓克鐵克水出焉東北流入於大朱勒都
斯河

新疆圖說廓克鐵克水源出庫車戈達朗嶺東北
流一百三十里與大朱勒都斯河會

案戈達朗嶺在托干奇恰山東北與喀喇沙爾
界輪台鄉土志作格爾大浪蓋庫輪交界山也

托干奇恰山拉依蘇水出焉

新疆圖說拉依蘇水在庫車城東二百六十里源
出城東北托干奇恰山南流一百八十里折而東
南流一百五十里至曲玉坎伏於草湖

哈喇庫爾嶺伊蘭之水第納爾之河出於其麓南流
均伏於沙

西域圖志哈喇庫爾達巴在烏什噶克塔克西南
一百里鄂頗爾西玉古爾北巖厓高峻爲天山支
峰之傑出者第納爾郭勒伊蘭布拉克發源南麓
案新疆圖說第納爾水亦名布告爾河其源出

庫車迭拉達坂迭拉者第納爾之轉音也玉古爾卽布古爾漢輪臺地哈喇庫爾嶺在其北

愛呼木什山

西域圖志愛呼木什塔克在哈喇庫爾達巴西一百五十里山形卑小亦天山支峰

一統志愛呼木什山在哈喇沙爾西北山形卑小亦天山之支峰

案新疆舊圖作阿依古木什北至托干奇恰山九十里在拉衣蘇水之東東界哈喇沙爾輪臺鄉土志作阿亦庫米什

塔里白山巴克蘇克提水出焉西南流伏於戈壁

新疆圖說巴克蘇克提水在庫車城東二百一十里源出城東北塔里白山西南流一百四十五里至巴克蘇克提又南流六十里至阿爾巴特驛又流三十里伏於戈壁

案塔里白山東北與托干奇恰山接其西南卽庫克納克也

庫克納克山額什克巴什之水出其南麓

西域圖志庫克納克達巴在愛呼木什塔克西五十里額什克巴什郭勒發源南麓山脈自額什克

巴什鄂拉分支東行六十里至此

案庫克納克一作扣克訥克新疆識略云水經

注龜茲川水之東川即今庫車城東扣克訥克

嶺水扣克訥克嶺在城東北五百餘里山下三

水南流繞嶺西至博勒齊爾卡倫山後左右分

注二里許合為一水出山之東復分為三一曰

密爾特彥河經城西東南流百八十餘里入沙

哈里克湖一烏恰爾薩依河亦東南流百八十

餘里入沙哈里克湖一曰葉斯巴什即額什克巴什河南

流五十餘里入阿提委訥克湖皆不入西川與

水經注異

阿爾齊山塔里克水出焉南流一百里入於庫克納克河

新疆圖說塔里克水在庫車城東北二百三十里

源出城東北阿爾齊達坂南流一百里至庫克納

克卡與東川河會

白司坦山意塔拉水出焉東南流四十里伏於戈壁

新疆圖說意塔拉水在庫車城東北一百一十里

源出白司坦山

泰來買提嶺托克拉蘇水出焉南流入於庫克納克

河

新疆圖說托克拉蘇水在庫車城東北一百七十里源出泰來買提達坂南流一百里至拜吉卡與東川河會
庫車鄉土志城北二百五十里泰來買提達坂界焉耆府屬之著勒都斯
而什山克牙衣拉克水出焉東流入於庫克納克河
新疆圖說克牙衣拉克水在庫車城東北一百六十里源出城北而什達坂東流九十里至拜吉卡與東川河會

朵托山有水焉東流入於庫克納克河

新疆圖說朵托水在庫車城北八十里源出城北朵托山曲折東流六十里至銅廠山口與東川河會

案朵托山在而什西南而什山在泰來買提西南泰來買提嶺在阿爾齊西南阿爾齊山在庫克納克北白司坦山則在庫克納克河南朵托山之東南

托和拉旦嶺

庫車鄉土志城西北九十里托和拉旦達坂界拜

城縣屬之和色爾地方

案庫車城西北四十里至夏德郎卡倫又三十里至托和拉且驛從山峽中行石土夾立嶙峋險峻為西出阿克蘇之大路俗名鹽山口

丁谷山

新疆圖說丁谷山今千佛寺一帶大山在城西五十里西域水道記丁谷山山勢陡絕上有石室五所高丈餘深二丈許就壁鑿佛相數十鋪瓔珞香花丹青斑駁洞門西南向中有三石楹方徑尺隸書梵字鏤刻同環積久剝蝕惟辨建中二年字又

有一區是沙門題名首行曰沙門日二行曰惠親

惠三行存一字若磨改者四行曰法兩岸有故城

水經注引釋氏西域記曰龜茲國北四十里山中

有寺名雀離大清淨

按洛陽伽藍記云乾陀羅城東南七里有雀離浮圖是國王伽尼色伽所作西域浮圖此為第一則龜茲此寺蓋以塔為名也高齊亦寫築此寺於華林園即劉桃枝拉殺趙郡王叡處辨機記云屈支國

城北四十餘里接山阿隔一河水有二伽藍同名

昭怙釐而東西隨稱佛像莊飾殆越人工僧徒清

肅誠為勤厲今溯遺跡差存髣髴

庫車鄉土志托和拉且達坂之西南俯瞰渭干河

有千佛洞山之上下前後鑿洞四五百處皆五彩

金粉繪西番佛像甚莊嚴最高一洞三楹壁鑿白衣大士像漢楷輪回經一部餘皆番字

銅山其上多銅多石油

新疆圖說大河西岸銅山在庫車城北一百二十里大河東岸銅廠山在庫車城北一百五十里光緒丁未年勘礦公牘庫車銅山距城一百二十餘里出北門四十里許至蘇巴什道路平坦由蘇巴什北行二十里至老銅廠此廠早已停辦再北行四十里抵新銅廠由廠西行十五里進山口又循山口東行約十里係小河溝始抵銅山麓由此

上嶺約三里有坐北向南礦洞一洞入地深十五丈前數年坍塌又有坐南向北一洞深二十丈寬一丈五尺取有銅苗兩洞勢對峙中間沙溝由溝往北直下約二里又一洞深十五丈亦取有苗此洞礦產最佳因洞內泉水浸注不能採取現傍此洞另開新洞各山苗脈大勢均由西而東其質性石土參雜不甚堅硬其餘有質出見隨開隨止之處極多由老銅廠起北行約十里進山再行十餘里道路崎嶇有石油洞數處前數年曾有土民採用大約每工能取二三觔銅廠需用柴炭相距炭

審一百五十里祇能馱載不利車行

已上庫車境內支山

又東曰達哈特之嶺

新疆圖說達哈特嶺今名塔格特達坂在哈喇沙爾城西北七百五十里

案昌曼河西北流經昌曼卡倫又西北經達哈特嶺北其嶺水又西北流入於空格斯河

又東北曰納喇特之嶺其陽塔里木哈達之水出焉南流入於朱勒都斯河其陰昌曼河之水出焉北流入於空格斯河其上多鹿有獸焉狀如小兒善啼笑名曰人

猥

西域圖志納喇特達巴在烏得音郭勒達巴南六十里空格斯南山脈自汗騰格里鄂拉由特克斯郭勒南折而北又南經西裕勒都斯郭勒北蜿蜒東走五百里至此又折而北

西域水道記昌曼河發自納喇特嶺數泉噴湧聚而成川其地多鹿諺名鹿圈卽博物志所謂鹿暖者也

伊犁鄉土志那魯特達坂在府城東南六百餘里爲額魯特下五旗遊牧草場

新疆圖說克木拉克山亦名那喇特嶺在喀喇沙爾西北五百餘里

案那魯特卽納喇特皆額魯特之轉音庫車鄉土志圖作納勒達坂中俄交涉記云那挨拉脫山路卽納喇特近有參將普來乾罷魯斯克查看空吉斯河極東水岸踰耐拉得山卽納喇特上山路不能帶駱駝沿耶魯前子川而下山路漸低夷時九月中旬山陰斜面有微雪山陽無雪此山路高度約九千八百買依路司案嶺在伊犁城東南通喀喇沙爾自此而西至納林河爲額魯特

遊牧

又東曰烏得音郭勒之嶺其上多松林其西麓空格斯之水出焉西流會特克斯哈什兩水而入伊犁河其東麓有溫泉石蟄存焉

西域圖志烏得音郭勒達坂在額布圖達巴西南五十里東裕勒都斯郭勒西空格斯一作喀吉斯郭勒發源西麓山脈自納喇特達巴東行六十里折而北至此東谷口通裕勒都斯西谷口通空格斯一統志烏得音嶺納喇特嶺皆在伊犁東與額布

圖嶺相接

西陲紀略載雍正中使臣至準噶爾行程記云正月二十日自鄂敦庫爾山東口起程踰鄂敦庫爾嶺五十里入西邊山口兩岸松樹稠密中間流水潺湲瘴氣漸清山水秀麗如畫惟遇雨雪坡滑難行二十一日順空格斯河在岡口內行六十里岫頂松林澤眉柳樹時聞鶯聲二十二日八十里宿鄂敦庫爾山西口二十四日六十里宿空格斯河之水西域水道記空格斯河源出哈喇沙爾西北境鄂敦庫爾嶺西麓其東麓有溫泉石磴尙存故老言是準部遺迹

案新疆圖說云崆吉斯河在哈喇沙爾城西北五百五十里其源出土爾扈特部落阿墩庫爾雪山阿墩庫爾卽烏得音郭勒之變音也案鄂敦阿墩隨筆記音蒙古語阿墩星也準語庫爾謂積雪或作額通古里一作阿敦苦魯

又東北曰額布圖之嶺其上多金多硫黃多野馬黃羊青羊麋鹿其陰額布圖之河出焉而北流注於布勒哈齊淖爾亦作喀喇塔拉額西柯淖爾其陽札噶蘇台格訥特烏里雅蘇台諸水出焉而南流注於珠勒都斯河

西域圖志額布圖達巴在額林哈畢爾噶鄂拉西

三百里東裕勒都斯郭勒北額布圖郭勒發源北麓札噶蘇台格納特烏里雅蘇台諸布拉克出其南山脈自伊犁南境之汗騰格里鄂拉東行六百餘里爲納喇特達巴又東北六十里爲烏德音郭勒達巴又東北五十里至此東西橫亘其東南一支由額林哈畢爾噶鄂拉東行爲迪化南境之山其西北一支由哈喇古顏鄂拉西北行爲伊犁北山額布圖達巴其分脈處也
一統志額布圖嶺在庫爾哈喇烏蘇東南與哈喇古顏山圖嶺相屬

新疆圖說額爾圖嶺在庫爾喀喇烏蘇城西南一百八十里亦名額畢特嶺

案額爾圖卽額布圖一作額卜推嶺北所出之水曰大比拉阿圖曰木吉克曰三吉曰木的圖曰喀峽圖曰東斗此二水者濟爾噶朗河之發源也統名曰額布圖河乾隆二十二年成袞札布奏言明瑞在額布圖嶺口遇賊千餘擊之奪其寨進至額林哈畢爾噶卽此山也額布圖準語順適之謂其山產硫磺礦質黃黑不一烟氣火燄顯露於外惟山高不易開採耳

又東曰恰克圖之嶺濟爾噶朗之水出焉北流注於布勒哈齊淖爾

又東曰古爾班之嶺亦濟爾噶朗河之發源也

西域水道記濟爾噶朗河三源發南山名古爾班

恰克圖水山中產金置濟爾噶朗金廠廠西南有

山曰額布圖嶺

又東曰命各斯太之嶺將軍河水出焉西北流伏於戈壁

新疆圖說將軍河在庫爾喀喇烏蘇廳城西南四十里源出命各斯太達坂西北流六十里哀里噐

水自北入之又流二十里至半截溝伏於戈壁

又東北曰額林哈畢爾噶之山多銀多鐵多硫磺多煤炭石油其獸多虎豹獐鹿狐鹿熊羆駝野牛野驃野豕其陰奎屯之水出焉而西流入於布勒哈齊淖爾和爾郭斯之水即霍爾果斯諺曰博羅通古河出焉而北流入於地安濟哈雅之水出焉而東北流潞為小澤巴倫哈布齊垓之水出於其陽而東南流注於海都之河

西域圖志額林哈畢爾噶舊音額林哈畢爾罕在古爾班多博克鄂拉西北六十里和爾郭斯安濟哈雅兩郭勒發源北麓巴倫哈布齊垓郭拉出其

南山脈自額布圖達巴東行二百二十里踰安濟
哈雅至此乾隆二十二年討阿睦爾撒納遣官祭
告二十四年西域平秩於祀典每歲春秋致祭是
山在博克達鄂拉西八百里哈屯博克達鄂拉西
一百里博克達尊如人首額林喀畢爾噶譯言硬
肋居元首之左右天山最高峰爲博克達則左右
山皆可謂之額林哈畢爾噶今其方言猶以此爲
博克達左右山之通稱茲據告祭所在定爲哈屯
博克達西百里之山而推其名義如此
一統志額林哈畢爾噶山在迪化州西南東南去

古爾班多博克山六十里兩城平秩於祀典有告
祭歲祭額林哈畢爾噶山文

蒙古遊牧記通謨克傳云康熙五十六年大軍進
剿準噶爾時策妄阿喇布坦游牧博羅塔拉以額
林哈畢爾噶爲要隘是策妄建庭於此也迨阿逆
之叛亦居其地方略云乾隆二十年二月巴里坤
辦事大臣和起奏阿睦爾撒納同台吉額林沁舍
楞在博羅塔拉道都托羅海地方居住是也二十
二年阿逆自哈薩克潛歸伊犁又會諸賊坐牀於
此欲自爲汗兼綜諸書足知形勢奎屯河猶言冷

水河源出額林哈畢爾噶山山產金乾隆三十六年置廠其年土爾扈特歸順置東路二旗千二百二十戶於奎屯河西岸明年伊犁將軍舒赫德以土爾扈特郡王巴木巴爾游牧與淘洗金沙之河相距三十餘里罷兵丁之洗金者四十七年都統明亮仍置廠金夫二百一十人納課如羅克倫河例四十八年都統海祿復奏裁司金局改歸鎮迪道總理而責諸各州縣兵燹後罷金課聽民採取由官督收定直於是民多私售不能詰而傭直日昂採者無所利稍稍衰止矣

新疆識略額林哈畢爾罕山在惠遠城東北四百餘里乾隆二十一年大軍再定伊犁將軍兆惠由此進兵

新疆圖說額林哈畢爾噶山在庫爾喀喇烏蘇城南一百三十里

案安濟哈雅卽綏來縣西南之安集海設有驛站西域圖志云安濟哈雅東北流瀦爲小澤蓋今之達連湖也和爾郭斯爲綏來縣之金溝河北流至孔道北入於地正與今合布勒哈齊淖爾古名鹽海子在精河城北五十里金溝河出

粉片豆瓣石滾諸金而懸崖絕壁有閻王邊鬼
打毬鷄冠巖絕命巖等名艱於採取

又東南曰古爾班多博克之山其陰烏蘭烏蘇之水出
焉東北流注於瑪納斯河

西域圖志古爾班多博克鄂拉在哈屯博克達鄂
拉西四十里瑪納斯南哈布齊垓北烏蘭烏蘇發
源北麓

一統志古爾班多博克山在迪化州西南

案古爾班多博克蒙古語古爾班三也西域水
道記云瑪納斯河西七十餘里爲烏蘭烏蘇河

源出綏來縣南古爾班多博克亦曰烏蘭烏蘇

山出水二支東曰庫克河西曰錫博圖烏蘭烏

蘇北流而會出山又北流數十里逕烏蘭烏蘇

軍臺西

軍臺距縣城八十里

又西北流百餘里與瑪納斯河

會乾隆二十二年察哈爾總管端濟布搜捕烏

蘭烏蘇山內沙札海匪賊至美羅托山追擊之
殺賊百餘卽其地也

又東曰衛和勒晶之嶺龍骨河水出焉北流入於阿雅
爾淖爾

綏來鄉土志縣城正南之小衛和勒晶嶺及大衛

和勒晶嶺卽龍骨河之源一曰烏隆古河河口在甘溝山南

西域水道記瑪納斯河五源分出哈屯博克達之衛和勒晶嶺乾隆二十二年參贊雅爾哈善言端齊布等至克伯訥克圖嶺詢知巴哈曼集等在瑪納斯河源之小衛和勒晶居住隨帶兵追之賊越大衛和勒晶嶺逃遁過嶺卽裕勒都斯地方瑪納斯河源水清產玉故又曰清水河玉色黝碧有文采璞大者重數十觔

又東曰哈屯博克達之山哈齊克之水有三源焉而皆出其陰東北流百二十里踰孔道入於地瑪納斯之水有五源焉而北流一百里入於烏蘭烏蘇其中多碧玉其陽多木達都哈布齊亥之水出焉而西南流注於朱勒都斯河

西域圖志哈屯博克達鄂拉在孟克圖西北三百里綏來縣南哈布齊亥北哈齊克瑪納斯兩郭勒發源北麓多木達都哈布齊亥郭勒出其南山脈自額林哈畢爾噶鄂拉東南行六十里爲古爾班多博克鄂拉又東四十里至此其高不及迪化州東境之博克達鄂拉而勢亦聳峻天山次高峰也

唐書突厥傳咄陸以處月處密兵圍天山而不克
郭孝恪拔處月俟斤之城抵遏索山降處密部而
還案唐處月部爲金滿州在北庭今爲迪化州以
東博克達鄂拉以北之地處密部居處月西在今
瑪納斯郭勒左右當哈屯博克達之北咄陸以處
月處密兵進圍天山者迪化州東境之博克達鄂
拉也孝恪追北之會先拔處月城後抵遏索山是
遏索山必在處月之西爲今之哈屯博克達鄂拉
而處密居山之北兵至其境故降也
一統志哈屯博克達山在迪化州西山勢聳峻次

於博克達山

案哈屯博克達一作和屯博克準語哈屯顯者
妻也博克達山爲最高峰而此山配之故名在
焉耆府城北其南所出之水爲海都河之一源
新疆圖說載瑚斯圖達坂瑚斯圖水東流一百
六十里至綏來之金版玉底折而北流爲瑪納
斯河瑚斯圖與哈屯皆相連之山而圖說又載
有和屯博克嶺並無北出之水必有一誤也辛
卯侍行記云唐書突厥賀魯居邪羅斯川今額爾濟斯河
下流貞觀二十三年爲乙毗射匱可汗所迫乃內
名也

屬置瑤池都督府以賀魯爲之高宗永徽元年
賀魯叛四年罷瑤池都督卽處月置金滿州沙
陀傳云處月在金娑山陽蒲類之東則金滿州
在今鎮西廳北非庭州之金滿縣也顯慶元年
遣盧國公程知節爲葱山道行軍大總管率五
將軍進討擊敗歌邏祿及處月副將周智度拔
處木昆城前軍蘇定方擊敗賀魯別部於鷹婆
川歌邏祿卽葛羅祿在堅昆南金山之西據此
見知節踰阿爾泰山矣鷹婆川前人謂是哈喇
沙爾西北之裕勒都斯河案處木昆在阿爾泰

山西知節統軍在彼舊唐書蘇定方傳云定方
至鷹婆川去知節十許里此川必在科布多西
疑今喀喇額爾齊斯河烏龍古河之類也庭州
屬唐莫賀咄在直北唐兵自天山北來賀魯豈
南越庭州而拒之裕勒都斯耶今案賀魯內屬
唐書明言處庭州莫賀城非庭州北也金滿州
卽本金滿縣爲名陶保廉以金滿州在鎮西廳
北不知何據處月種人甚多沙陀傳云突厥西
部治烏孫故地與處月處密雜居蘇定方擊敗
賀魯別部者卽此鷹婆川去知節十餘里十或

爲千字之誤以金山距天山言之鷹婆川雖不定爲今之珠勒都斯然約在天山左右也陶氏讀書好爲翻案多出臆斷此其弊也圖志以今山配合古地亦不過得其彷彿而已

又東南曰孟克圖之嶺在昌吉縣南多金鐵其陰昌吉之水出焉而北流入於地羅克倫之水出焉而北流注於呼圖壁河

西域圖志孟克圖達巴在烏可克達巴西南四千里昌吉縣治南昌吉羅克倫兩郭勒發源北麓山脈自西北三百里之哈屯博克達鄂拉東行二百

三十餘里逾登努勒台境折而東南五十餘里又東行約百餘里至此岡巒特峻後漢書西域傳焉耆國四面有大山案今哈喇沙爾古焉耆國楚輝塔克當其北是爲古焉耆國之北山至周隋二書所謂焉耆國在白山南七十里指天山正榦而言又當在楚輝塔克北以今之孟克圖達巴當之方位適合

三州輯略乾隆二十七年辦事大臣旌額理等具奏烏魯木齊每年各屯所需農具俱由內地運送詢悉哈喇巴爾噶遜昌吉河源等處產鐵隨調取

吐魯番同子鐵匠四名帶領厄魯特等前赴昌吉
河源創鐵鎔化試鑄農具尙堪應用較之內地輓
運大爲節省三十年辦事大臣伍彌泰具奏查現
在鐵廠每月計出生荒鐵四千八百觔一年可得
生荒鐵五萬七千餘觔生熟鐵器均能鑄造派遊
擊同知二員在廠總理嗣後改歸迪化州中營參
將管理

西域水道記回語謂涌出爲羅克倫言其地有瀑
泉上涌也其河二源出孟克圖嶺之麓乾隆四十
七年於其地置金廠河流逕雅瑪拉克山西而會

出山口諺曰天河北流分渠逕羅克倫軍臺東軍
臺距昌吉縣城十里

其前至案孟克圖準語經久之意山雪經年不消故名

又東北蒙柯圖卽孟克圖洪圖作蒙克圖乾隆二十三

年參贊永貴奏侍衛圖倫楚冒雪踰孟克圖嶺

搜捕逸賊卽此山也新疆圖說云洛克倫在昌

吉縣西二十里其河二源一出格柵圖山一出

哈喇沙爾境小珠勒都斯克霞達坂

新疆識略云洛
克倫河源一出孟克圖嶺
出格柵圖山東北爲烏拉巴圖水東流入昌吉境至

雙岔河口與呼圖壁河會洛克倫卽羅克倫其

卡
在昌吉西北羅克倫河之東克霞與孟克圖
蓋一嶺而異名在焉耆府城東北昌吉縣城西
南北卽紅札金廠也金廠南距焉耆府城四百
里據圖克霞東出之水尙有而布阿羅果勒水
入吐魯番境西出之水有烏拉蘇台水與哈布
齊亥水會
又東北曰烏可克之嶺阿勒塔齊之河出於其陰而東
北流至府城南分爲二支北流一百里入於地
西域圖志烏可克達巴在哲爾格斯鄂拉西三十
里爲迪化州西南屏阿勒塔齊郭勒發源北麓

案烏可克洪圖作烏克克準語小櫃也山形似
之新疆圖說云迪化縣城南至阿爾塔齊河源
九十里與喀喇沙爾小朱勒都斯連界
又東曰哲爾格斯之山其西麓古爾班哲爾格之水出
焉西流注於塔拉斯河

西域圖志哲爾格斯鄂拉在阿拉癸鄂拉西北三
十里迪化州南古爾班哲爾格郭勒出其西山脈
自孟克圖達巴東北行四十里爲烏可克達巴又
東行三十里至此

察罕薩拉嶺察罕薩拉之水出焉東流踰嶺入於瑪

納斯河

新疆圖說察罕薩拉水在喀喇沙爾城北六百三十里源出察罕薩拉達坂東流至澤達坂入綏來境

珠勒都斯山其中多黃金東西珠勒都斯之水出焉是為海都河之源

新疆圖說珠勒都斯山即土爾扈特部落一帶大山在哈喇沙爾城北四百五十里

西域釋地珠勒都斯山在哈喇沙爾城北珠勒都斯之地北連雪山同環千餘里水草豐茂為土爾

扈特和碩特遊牧

使準噶爾行程記正月十七日自察罕鄂博圖或

插漢鄂博圖住小裕勒都斯或作準地方九十里十八日住

大裕勒都斯地方八十里十九日住鄂敦庫爾口

或作阿敦苦魯五十里

同疆通志著勒土斯山西陞紀略作準圖斯在哈喇沙爾城北一帶乾隆三十六年安置土爾扈特霍碩特爾部落所屬人萬餘戶住牧於此春三月入山居住秋九月出山在哈喇沙爾附近草地支架蒙古包居住阿克蘇辦事大臣每年接到哈喇

沙爾土爾扈特霍碩特爾入山咨文派官兵坐卡倫九月出山撤回卡倫咨報各處

蒙古遊牧記南路舊土爾扈特部喀喇沙爾城北當天山之南珠勒都斯至京師八千六百餘里明為回部所據乾隆二十三年回部平地屬喀喇沙爾大臣轄三十六年 賜南路舊土爾扈特及中路和碩特為牧地四旗曰南路汗旗渥巴錫者阿玉奇曾孫也乾隆三十六年掣所部內附 賜牧齋爾三十八年徙牧珠勒都斯中旗右旗左旗與中路和碩特三旗同遊牧有珠勒都斯河繞遊牧

境東踰天山至博爾圖嶺南至扣克納克嶺西至天山北至哈倫所部四旗同牧自為一盟曰烏納思素珠克圖盟歸伊犁將軍節制中路和碩特部附南路土爾扈特部同遊牧珠勒都斯設札薩克四今所部餘札薩克三曰中路中旗中路右旗中路左旗牧地在南路舊土爾扈特之西

藩部要略云乾隆三十七年

賜諸札薩克牧地汗渥巴錫等牧齋爾和碩特貝勒恭格等牧珠勒都斯至三十八年渥巴錫等亦移牧珠勒都斯二部土壤雖近究非一地新疆議略載哈喇沙爾南路舊土爾扈特與和碩特牧地各有四至則所云二部同一遊牧者特舉其大概言之會典圖說云土爾扈特四旗在哈喇沙爾城北其西為中路和碩特三旗區別甚明 東至烏沙克塔爾南至開都河西至

小珠勒都斯北至察罕通格山所部三旗自為一

盟曰巴啟色勒啟勒圖歸伊犁將軍節制

案珠勒都斯一作著勒都斯亦作裕勒都斯張穆云以地勢言之額林哈畢爾噶在伊犁東北珠勒都斯則在伊犁東南乾隆間阿逆以伊犁叛時大軍在巴里坤諾爾卜敦多克及圖們由間道達巴里坤皆出珠勒都斯則珠勒都斯爲天山南北路相通要隘明矣及南路進兵亦必由此漢時烏孫爲西域強國唐置鷹婆都督府爲重鎮有以哉案乾隆丁丑春將軍成袞札布參贊舒赫德等由珠勒都斯路進伊犁道遇克

勒特烏魯特沙喇斯瑪噶斯等鄂拓克皆撫降其衆大軍過復叛乃遣都統滿福領偏師追勦沙喇斯瑪噶斯等賊人詭持軍門札自稱已就降撫並云前驅除道以待滿福行次哈拉和落竟以墮計捐軀卽此地也土爾扈特部內有曰紅札曰老鴉溝曰阿烏塔哈者皆昔日金厰荒山積雪春冬之間人不能近夏秋時方能開採今已停矣

哈布齊垓山哈布齊垓水出焉

西域水道記哈布齊垓水發自哈布齊垓山行程

記云出阿拉癸山口七十里至古爾班登努勒台

準語登努勒台濱水草俱美周圍皆策妄阿喇布坦格

河土阜之帶草者之屬達賴錫拉圖人居之越二嶺雖有

之長子緯羅斯第十六世汗石易行前望西北有三山即古爾班哈布齊垓山

山三口俱流水自登努勒台踰第一哈布齊垓小

山梁凡六十里至中哈布齊垓山山東為額林哈

畢爾噶山言東者蓋東北自中哈布齊垓山經哈屯博克達

山南峪外路有石渡河數次峪內錫拉圖喇嘛之

屬居之凡七十里至第三哈布齊垓山又自此越

察罕鄂拉博克圖嶺凡百里至察罕鄂博圖途路

平坦水草皆美所謂三山口流水即三哈布齊垓

河也曰巴倫哈布齊垓河準語巴倫西也曰多木

達哈布齊垓河準語多木達中也曰準哈布齊垓

河準語準東也向皆滙於烏蘭烏蘇今泉勢微弱

出谷之水僅溉克札一區蒙古田無滙烏蘭烏蘇

者

新疆圖說哈布齊海山在喀喇沙爾城西北一百

五十里

案哈布齊海即哈布齊垓圖說蓋指準哈布齊

垓而言

阿羅蘊山清水河出焉南流入於博斯騰淖爾曲惠水出焉南流伏於草湖阿羅果勒水出焉東流入吐魯番之伊拉湖

案阿羅蘊山在焉耆府城東北和碩特部落爲清水河發源處清河南流一百三十里至清水河驛距城九十里其山蓋距城二百二十里東至阿拉癸山口二百八十里

田吉克山木圖特水出其北干糾爾圖水出其南合而東流曰作洛滿苔之水入於吐魯番之伊拉湖其南則色勒格勒水之所出也南流八十里伏於地

新疆圖說田吉克山在喀喇沙爾城東北亦名登奇蓋山

案田吉克山在阿拉癸山西南阿羅蘊山東北阿拉癸山

西域圖志阿拉癸鄂拉在托克喇鄂拉西南二十里迪化州南入東谷口西行一百三十里山深林密人馬登陟崖坎六十餘里徑轉險窄駝馬難行又七十里仍在谷內倚山一角有土城城內鑿山如梯狀爲闢展西至裕勒都斯關隘

一統志阿拉癸山在迪化州南七十里

新疆圖說喀喇沙爾廳城東北至阿爾輝山五百
四十里與迪化縣連界

使準噶爾行程記正月初九日自伊拉里克一百
四十里住阿拉癸或作阿爾灰峪口路途寬闊有碎石將

近阿拉癸之地東邊有小河名特克河向西南山
峪流去阿拉癸峪內河水清澈樹木成林但行人
在兩邊崖坎上下行走駝馬甚苦初十日仍在阿
拉癸峪內六十里住過河七八次樹木稠密徑道
險窄十一日仍在阿拉癸峪內七十里住山口有
土城已壞城內鑿山爲石梯出阿拉癸山口時過

一嶺名阿拉癸卽愛達巴漢自阿拉癸山口至空
格斯河凡九日程阿拉癸山口西行四百七十里
至大裕勒都斯又六十里至鄂敦庫爾山口

案阿拉癸今名阿爾輝爲焉耆吐魯番界山準
語阿拉癸危險之意自吐魯番城西偏南三十
里雅木什又三十里布榦台又六十里托克遜
城由此轉北四十里伊拉里克西入阿拉癸峪
有仄徑可通伊犁

峽立蓋山有水焉出於其陽向西流入哈布齊亥河
案峽立蓋蒙古語銀蝦蟆山也

鐵克嶺有水焉西南流匯於哲爾格斯河

案鐵克嶺在峽立蓋山之東八十里蘇木特山之西六十里蒙古語野羊山也山脈與峽立蓋相接山下卽阿拉癸中有石壘土墩土人相傳唐兵當日駐營於此

蘇木特嶺其陰玉比耳河之水出焉南流會於阿拉癸河

案蘇木特嶺在鐵克之東六十里與鐵克山脈相接蒙古語箭幹山也

克克諾克山

案山在博羅圖嶺之東八十里與博羅圖山脈相接又與蘇木特山合成一幹蜿蜒東趨隨地異名入迪化吐魯番境蒙古語種穀鳥山也

哈布嶺輝武乃水出焉東北流入於烏斯圖果勒河案哈布嶺在焉耆府城東北與霍同察海山相接

得蘭山察罕沙拉水出焉東北流入於烏斯圖果勒河

案得蘭山在焉耆府城東北東與哈布嶺相接西北卽博羅圖山也

博羅圖山其上積雪無草木博羅圖之水出於其陰
西域圖志博羅圖塔克在納林奇喇塔克西五十
里當喀喇沙爾東北境山多積雪博羅圖郭勒發
源北麓乾隆二十六年遣官祭告每歲春秋致祀
入北谷口西行通裕勒都斯出西南谷口西南行
卽喀喇沙爾境其山與阿拉癸鄂拉南北相接形
如鎖鑰西通準部南界回疆闢展西南境一大關
隘也

一統志博羅圖山在闢展西北當喀喇沙爾東北
境山多積雪乾隆二十六年遣官祭告有告祭歲
祭博羅圖鄂拉文
新疆圖說博爾圖山亦名伯羅圖在喀喇沙爾城
東北三百八十里

案博羅準語青色也西域水道記云漢書曰焉
耆東北有大山所謂焉耆山卽天山也新疆北
路之南面大山皆可謂天山而漢書屢言天山
則其時必舉一主峰名之晉灼顏師古不能實
指其地唐書地理志亦兩歧其說證以漢書匈
奴傳西域傳蓋其時所謂天山卽今之博羅圖
山山在焉耆國之北故又曰焉耆山太平御覽

引西河舊事匈奴歌曰亡我祁連山使我六畜
不蕃息失我焉支山使我婦女無顏色焉支爲
焉耆之通借祁連與焉耆並舉正以互文見義
非祁連山之外別有焉耆山也蒙古語謂天爲
騰格里西域有騰格里山今時指爲天山主峰
亦非漢書之天山也今案史記匈奴傳驃騎將
軍出隴西北地攻祁連山衛將軍傳過小月氏
攻祁連山前漢書霍去病傳遂臻小月氏攻祁
連山揚武乎饒得小月氏饒得皆張掖地祁連
卽張掖山去病攻祁連在元狩二年春時張掖

尙屬匈奴是年秋昆邪王降始置酒泉武威二

郡元鼎六年增置張掖敦煌斷匈奴右臂於是

漢兵始得深入西北天漢二年貳師將軍出酒

泉擊右賢王於天山

史記匈奴傳正義云在伊州

此後政和二年

重合侯馬通

匈奴傳作莽通

出酒泉至天山因降車師後

漢明帝十六年竇固破呼衍王於天山留兵屯

伊吾盧和帝永元中南單于求滅北庭輕兵兩

道襲之右部從匈奴河水西繞天山南是漢時

於張掖山專稱祁連而伊吾以西之山未嘗目

爲祁連也史記大宛傳始月氏居敦煌祁連間

正義曰初居敦煌以東祁連山西祁連在甘州西南又案霍去病擊匈奴先過焉支乃攻祁連太平御覽引西河舊事曰祁連山在張掖酒泉二界焉支山在剛丹縣東西百餘里宜畜牧匈奴歌曰亡我祁連山使我六畜不蕃息失我焉支山使我婦女無顏色蓋因漢武於張掖開置郡縣故惜而歌之若伊吾以北之天山終漢世未嘗全屬於漢博羅圖又在其西南千餘里安得謂焉耆爲焉支乎且太平御覽引西河舊事明謂祁連山在張掖酒泉界焉支山在剛丹縣

徐氏乃勉強牽合其讀書可謂粗心之至西域圖志博羅圖水源出博羅圖山北谷口新疆圖說謂其源出巴幸達坂東南八十里至博爾圖山口又南流三十里伏於草場巴幸在博羅圖西北蓋相接之山古統謂之博羅圖也

庫爾泰山

勘鑛公牘庫爾泰山在焉耆府城東二百五十里距烏沙克他莊一百六十里至厥道坦沙多厥設爐十四座前後有二井水味稍鹹厥至鑛山十里鑛脈由西而東山面北鑛苗上下寬三十丈東西

長一里許入土一尺至四尺不等鑛苗浮現土石
不堅不待開洞鑛山左右生梭梭木柴利於燒鎔
惟荒山無人僱夫不易丁未試辦一年中止鎔試
銅質稍硬不及拜城之柔粹耳

納陰克爾山

案山在察罕通格山之北六十里博羅圖山之
東南七十里係察罕通格北出之支蒙古語細
霜山也

察罕通格山

西域水道記博羅騰淖爾之北數十里爲察罕通

格山準語通格玉草也色白乾隆二十二年駐札
巴里坤辦事阿里袞奏言沙拉斯瑪呼斯人眾復
叛由察罕通格嶺遊牧過海都河因水勢甚大遂
由喀喇呼珠至烏蘭和屯會合昂吉岱等賊卽此
山也其山直北山谷口沙拉斯賊掠台站都統滿
福奏言臣到阿拉葵查看賊人踪跡進南山

由北路
言故曰

山南谷口與察罕通格相對南山者博羅圖山也

新疆圖說察罕通格山一名忙阿特山在喀喇沙
爾城東北二百三十五里其卡今已蕩廢無存矣
案察罕通格卽察罕通古在楚輝山之東北六

十里蒙古語白芨芨草山也山脈與楚輝相接
水向南流入烏沙克他莊田者導以灌地山麓
有石牆數壁土人相傳乾隆年間征準噶爾時
曾設台站於此

巴勒干嶺巴勒干台之水出焉西南流入於哈布齊
垓河

案巴勒干嶺在焉耆府城北土爾扈特部落東
南與薩薩克嶺接蒙古語紅柳山也山麓卽今
土爾扈特卓里克圖汗布彥蒙庫府府東側有
黃寺三座羶帳百餘喇嘛終年集此誦經蓋其

俗重黃教也

沙札蓋圖嶺他勒唐沙拉水出焉西北流注於哈布
齊垓河

案沙札蓋圖嶺在焉耆府城北土爾扈特部落
薩薩克嶺之南沙札蓋圖卡距城一百八十里
克里古圖山有水焉南流入於清水河

案克里古圖在沙札蓋圖之東三十里山脈與
沙札蓋圖山相接蒙古語霜山也其水入清水
河又南流入博斯騰淖爾

刀連山有水焉東北流入於察罕通格山

案刀連達坂在克里古圖山之東六十里山脈與克里古圖相接蒙古語斜坡山也山陰斜坡有深溝三道曰中塔什海東塔什海西塔什海爲和碩特中旗監長左右旗臺吉遊牧之處

輝拉山

案輝拉山在沙札蓋圖嶺之東土爾扈特部落舊王府東南蒙古語乾山也

沙克沙山其上松林茂密有水向北流入東哈布齊
垓河

案山在輝拉山之東五十里沙札蓋山之西一

百二十里山脈與輝拉山相接蒙古語謂米飯山也

楚輝山其南楚輝之水出焉南流入於地奇爾歸圖之水出焉西南流入於博斯騰淖爾

西域圖志楚輝塔克在喀喇沙爾城北十里阿拉
癸鄂拉分支也奇爾歸圖郭勒發源南麓南流至
楚輝城東資以灌田

案焉耆府城北十里內平曠無山楚輝當卽今
曲惠有莊在焉耆城東一百三十里清水河驛
之東爲東路赴焉耆者所必經其北大山卽楚

輝山圖志謂在哈喇沙爾城北者誤也

海都山眾水出其口名曰海都之河出焉耆城北環其西南折而東入於博斯騰淖爾

西域圖志海都塔克在楚輝塔克西二百五十里哈布齊垓南哈喇沙爾北哈布齊垓郭勒裕勒都斯郭勒咸會而南行出此山之口為海都郭勒山脈自西九百里之汗騰格里鄂拉分支東南行至此為喀喇沙爾北屏水經注焉耆之北敦薨之山在匈奴之西烏孫之東案哈喇沙爾為古焉耆海都塔克正當其北應為古敦薨山也

案山海經云敦薨之山其上多櫟柎其下多苾草敦薨之水出焉而西流注於泐澤出於昆侖之東北實惟河源攷水經注云敦薨之水出焉耆之山敦薨之山在焉耆之北與今海都山方位適合焉耆之水海都河為大滙合眾流以注於博斯騰淖爾復由淖爾溢出以入於蒲昌海者羅布淖爾即山經之所謂泐澤也敦薨之水既屬之海都河則敦薨之山必屬之海都山矣海都一作開都回語曲折之謂蒙古語多少之意也山上有洞土人相傳乾隆年間準噶爾汗

達什達瓦避兵於此

庫木什阿克瑪山庫木什水出於驛側之泉

西域圖志庫木什阿克瑪塔克在蘇巴什塔克北
谷口西南一百四十里自蘇巴什北谷迤邐西南
行十里漸聞水聲遍谷皆淺水山勢漸狹西厓壁
立人行其間如一綫天又里許卽沙灘又二十里
有大石崎嶇者數處車不能行爲車師國西境關
隘又二十里至艾格爾布拉克又五十里出南谷
口山脈自蘇巴什塔克分支西南行至此
一統志庫木什阿克瑪山在哈喇沙爾東同語庫

木什銀也阿克瑪積而不散之謂卽唐書所謂銀
山積也

案庫木什阿克瑪爲焉耆東界之山其驛在吐
魯番西南四百一十里由此西行十餘里入焉
耆境庫木什水南流三十里分灌地畝吐魯番
鄉土志云古名什穆大山

額格爾齊山其上多鉛

西域圖志額格爾齊塔克在庫木什阿克瑪塔克
西南一百三十里自庫木什阿克瑪塔克東口西
行四十里入南山之北口折而東南又迤邐西南

行三十里出南口又轉而西行六十里至西山下
玲瓏怪石徧地葦草掘之得水自此西南行入於
沙磧晉書西戎傳焉耆國四面有大山道險隘百
人守之千人不過唐書地理志銀山磧四十里至
焉耆界呂光館又經盤石案今庫木什阿克瑪譯
言銀山額格爾齊塔克有奇石當庫木什阿克瑪
西南境卽唐書所云盤石也呂光館雖不可考然
總在額格爾齊塔克東據唐書稱焉耆國橫六百
里以今形勢考之東自庫木什阿克瑪塔克西至
庫隴勒係焉耆全境則自當以銀山磧爲東界而

呂光舊館卽在其西可知

一統志額格爾齊山在哈喇沙爾東

案新疆圖說石大山在城東南四百七十里有
鉛礦卽額格爾齊山唐書所謂盤石也今之鉛
山卽古之銀山西域水道記云晉書西戎傳次
焉耆進屯鐵門未五十餘里要之於遮留谷今
自庫爾勒北二十里至嚴口所謂遮留谷入山
徑路崎嶇三十里越大石嶺下通海都河地處
要害或置關也下嶺十里至哈勒噶阿璊軍臺
河水又西行三十餘里出山水經注曰又西出

沙山鐵關谷也案大石嶺卽石大山哈勒噶阿
璊驛山谷古名鐵關谷準語哈勒噶謂道路言
地當山口也今名紫泥泉驛水經注云又西南
逕連城別住裂以爲田卽庫爾勒之地庫爾勒
皆良田今猶導渠以資灌溉焉

沙山是生鐵

西域圖志沙山在博斯淖爾南一百二十里爲哈
喇沙爾之南屏山脈自額格爾齊塔克踰沙磧至
此岡巒互互西接庫隴勒塔克漢書西域傳山國
西至尉犁二百四十里西北至焉耆百六十里西

至危須二百六十里東南與鄯善且末接山出鐵
居民山居寄田糶穀於焉耆危須晉書西戎傳沙
州刺史楊宣疆理西域以部將張植爲前鋒所向
風靡軍次焉耆熙焉耆拒戰於賁崙城爲植所敗乃
進屯鐵門未至五十餘里熙又率眾先要之於遮
留谷植將至或曰谷名遮留殆將有伏單騎嘗之
果有伏發植馳擊敗之進據尉犁案漢書山國民
山居師古注云長在山下居不爲城治也更以焉
耆危須尉犁三國相距里數考之焉耆爲今哈喇
沙爾危須爲今察罕通格尉犁爲今哈勒噶阿璊

則此山國當在今沙山東麓山谷間所謂東南與鄯善且末接者由沙山東南行入沙磧正當古且末鄯善國地也至晉張植之伐焉耆由沙州西北行次其國當在焉耆東南境今沙山居哈喇沙爾之南其山東西相屬則所謂遮留谷者亦當在今沙山東南麓由是西行而據尉犁總在焉耆南境若賁崙城故址則不可考矣沙山以漢名相傳非準回語云

案沙山在庫爾勒之東二百里與庫爾勒山脈相接緊傍波斯騰淖爾之南

庫隴勒山

西域圖志庫隴勒塔克在哈喇沙爾西南一百八十里脈自沙山西走百餘里至此勢極險峻古焉耆以西諸國關隘也

案今之庫爾勒回城以山得名也庫爾勒卽庫隴勒西域水道記云庫爾勒莊回語觀望也地形軒敞可供眺覽故名一作庫隴勒莊在庫爾勒軍臺南三里庫爾勒之境東接哈喇沙爾城西接古玉爾

古玉爾莊在庫城東北三百二十里爲玉古爾軍臺南十里爲玉古爾回莊東南至羅布淖爾五百餘里北至多羅嶺二百里

多羅嶺

西域水道記多羅嶺南至庫爾勒莊二百里

紅石合壘山

新疆圖說紅石合壘山在哈喇沙爾城西一百三十里

案西域水道記作紅石霍壘山在多羅嶺之西

白拉起山庫爾楚水出焉南流伏於草湖

案白拉起在焉耆府城西山南即庫爾楚驛

察汗沙太山

案山在白拉起西北五十里

西比爾肯山

案山在額勒伯克山之西二百里烏蘭烏蘇山
東一百里

烏蘭烏蘇山

案山在西比爾肯山西百餘里山口險窄為赴
庫車捷徑

喬境山

案山在烏蘭烏蘇之東南一百里烏浪漂立克
西北五十里

烏浪漂立克山

案山在喬境山東南五十里察汗沙太山西北
自察汗沙太以下諸山天氣溫和土爾扈特所
部巴倫旗分牧於此

蘇巴什嶺洋薩水出焉南流二百一十里伏於草湖
案蘇巴什嶺東距焉耆府城六百餘里在輪臺
洋薩爾驛之北

拜拉克山

西域圖志拜拉克塔克在達蘭達巴西北三十里
西裕勒都斯支河發源北麓
一統志拜拉克山在哈喇沙爾北

案拜拉克當卽今圖之巴圖拉山或作巴音布
魯克有水南流入於大珠勒都斯河其山在那
魯達坂之東蒙古台路出其南

烏什噶克山

西域圖志烏什噶克塔克在拜拉克西一百里西
裕勒都斯支河發源北麓

一統志烏什噶克山在哈喇沙爾西北

案西域水道記云大小裕勒都斯河會處有二
水經烏什卡克山東西來滙蓋卽今圖之江布
達坂古今異名耳西曰伙羅海水東曰庫克納

克水

烏蘭嶺

案烏蘭嶺在焉耆府城西北南北皆朱勒都斯河也西域水道記云大小朱勒都斯合流分爲二支北支行三百餘里有烏爾圖水薩必爾圖水郭爾和水台里布水雅瑪圖哈布齊爾水烏蘭嶺水固爾班敖克克水自北來入之今圖不載此嶺自此嶺以東二水復合而東

烏柯克嶺有水焉北流注於朱勒都斯河

案烏柯克嶺在焉耆府西綽羅特嶺之東朱勒

都斯河南

綽羅特克嶺綽羅特克水出焉北流入於朱勒都斯河

案綽羅特克嶺在珠勒都斯南支之南焉耆府城西北西域水道記云大小朱勒都斯二水既合復分爲二支皆東流南支行三百餘里有綽羅特克嶺水楊河沙爾水扣克納克嶺水厄西謨水烏柯克嶺水自南來注之據此則此嶺蓋在楊河沙爾之西今圖皆不載此嶺

達蘭嶺有水出焉南北分流入於大小珠勒都斯河

西域圖志達蘭達巴在海都郭勒西八十里哈勒噶阿璊城西北一百八十里山脈自汗騰格里鄂拉東南行七百餘里至此東與海都塔克接一統志達蘭嶺在哈喇沙爾西北巖崖高峻天山峰之傑起者

案達蘭準語七十也烏洛斯特水哈哈布齊水哈那挨特水喇馬爾金格水賽仁木水均出達蘭之陽南流入於大朱勒都斯河色嶺木水覺洛圖水吉木特水乃吉特水色乃烏生水烏蘭沙拉水均出達蘭之陰北流入於小朱勒都斯

河乾隆二十二年都統滿福勦沙拉斯瑪噶斯賊中鎗陣亡沙拉斯之得木齊敦多克哈什哈移戶口踰達蘭嶺毀海都河橋卽此山也嶺在珠勒都斯河北西域水道記載在河南誤矣察罕烏生嶺有水焉南流入於大朱勒都斯河

案察罕烏生嶺在焉耆府城西北土爾扈特部落達蘭嶺之東丹布山之西九十里蒙古語白水山也

丹布山雅瑪圖水出焉西北流入於小朱勒都斯河新疆圖說丹布達坂在哈喇沙爾城西北一百四

十里

案丹布山在焉耆府城西北土爾扈特部落察罕烏生嶺之東

哈哈爾山有水焉入於小朱勒都斯河

新疆圖說哈哈爾山在哈喇沙爾城西北二百里

案哈哈爾山在焉耆府城西北土爾扈特部落

西與丹布山接上有鄂博土人相傳準格爾輝

特偽台吉之冠埋於其下人欲近之必暴風大

作其山有道險窄為土爾扈特部貝勒輔國公

及台吉等赴珠勒都斯遊牧之捷徑

薩薩克嶺薩薩克水出焉西南流入於海都河

案新疆識略云和屯博克達嶺即哈屯博克達水南流右

會哈布齊海水又東南流左會薩薩克水復南

分二支入開都河新疆圖說云薩薩克水在哈

喇沙爾城北一百四十里

庫舍圖嶺

西域圖志庫舍圖達坂在額林哈畢爾噶鄂拉西

南五十里巴倫哈布齊垓郭勒經其東麓山脈自

額林哈畢爾噶鄂拉分支南行五十里至此又南

少西五十里為們都招達巴又南少西一百里為

鄂蘭達巴又南少西五十里爲額勒伯克鄂拉皆
傍東裕勒都斯郭勒之東而繞於其南爲天山正
榦之分支

一統志庫舍圖嶺在伊犁東山脈自額林哈畢爾
噶分支南行五十里至此

們都招嶺

西域圖志們都招達巴在庫舍圖達巴西南五十
里東裕勒都斯郭勒東嶺勢袤延南北相屬盡裕
勒都斯東境

一統志們都招嶺在伊犁東裕勒都斯河之東

案們都招蒙古語作們庫泰終年積雪不消之
意亦名大雪山

鄂蘭嶺

西域圖志鄂蘭達巴在們都招達巴西南一百里
東裕勒都斯郭勒南自們都招達巴南行五十里
過東裕勒都斯發源處折而西五十里至其地
一統志鄂蘭嶺在伊犁東們都招西南

額勒伯克山

西域圖志額勒伯克鄂拉在鄂蘭達巴西南五十
里東裕勒都斯郭勒南自鄂蘭達巴西又南踰山

口爲裕勒都斯東西兩郭勒合流東注海都郭勒
處今名開都河烏爾圖布拉克出其南

一統志額勒伯克嶺在伊犁東諸山自庫舍圖嶺
折而西南行至此皆傍裕勒都斯河之東而繞其
南爲天山正幹之分支

西域水道記喀喇沙爾直庫車城北之汗騰格里
山山東百餘里有地曰阿拉爾湧泉百餘會以東
流卽大裕勒都斯河其地土爾扈特卓哩克圖汗
所牧也東與小裕勒都斯河會小裕勒都斯出自
阿勒坦陰克遜之北和碩特牧地也環繞沮洳檻

泉數十涓涓細流逕鄂蘭嶺北有四水自北來入
之又西逕額勒伯克山北有烏里雅蘇台水自北
來入之又西南與大裕勒都斯河會有二水經烏
什卡克山東西來滙地當西域東西之中東達阿
拉癸山西接伊犁空格斯河源準部未靖時自哈
密至伊犁者恒取道於此

案準語額勒伯克豐裕之謂山多生殖故名攷
新疆識略小珠勒都斯西北流經楚爾嶺會英
布拉圖水又西會巴哈布拉圖水又西會札哈
蘇台水又西會固爾班克勒特水又西會克穆

訥克圖嶺水凡四百里折而南流至哈爾噶圖
與大朱勒都斯河合案其地位方向則楚爾嶺
卽鄂蘭嶺今焉耆府圖之土克達坂也克穆訥
克圖嶺卽額勒伯克嶺古今異名耳

已上焉耆境內支山

的拉爾山的拉爾水出焉南流入於恰陽河

輪台鄉土志的拉爾山在縣境西北與庫車交界
山中流水自庫車大雪山分出流經山口卽爲的
拉爾河源

已上輪臺境內支山

阿爾噶里圖山

西域圖志阿爾噶里圖鄂拉在奇喇圖魯鄂拉西
二百里奎屯南庫爾郭勒東當孔道南

夏喇格札爾山察罕水出焉西北流入於沙

圖山其上多鉛

庫爾喀喇烏蘇鄉土志圖山在廳城東南一百八
十里月牙台東二十里草木不生土石不雜周三
四十里土人掘地深二丈餘得鑛質色白光潔又
南二百餘里鹽池海腦俗名弔弔水亦產之惜山
路崎嶇無開採者

獨山產石油

庫爾喀喇烏蘇鄉土志獨山子在廳城東南六十里奎屯河左山土色赤周百餘里石油礦質色黑脈發自南山苗露土面掘孔尺餘泉水出焉油浮水面暑盛寒衰又城西七十里之旂桿溝九十里之將軍溝皆產石油

案新疆石油南北兩疆隨地有之採煉得法可擅五洲之利近已購機試辦矣

已上庫爾喀喇烏蘇境內支山

特圖山

西域水道記安濟哈雅河今作安集海發源於額林哈畢爾噶山大小二河匯流經特圖山口山口在綏來縣治西南三百六十里越山口北流入葦澤而止

博羅通古山

案綏來鄉土志云博羅托山為金溝河水之源博羅即博羅通古金溝河即和爾郭斯水也

博羅哈瑪爾山

西域圖志博羅哈瑪爾鄂拉在巴顏哈瑪爾鄂拉西北七十里哈齊克郭勒西陽巴勒噶遜南哈屯博克達鄂拉北當孔道南

奇喇圖魯山庫克河水出焉其中多綠玉東北流九
十里分爲莊浪三渠

西域圖志奇喇圖魯鄂拉在博羅哈瑪爾鄂拉西
五十里瑪納斯郭勒西烏蘭烏蘇東當孔道南
新疆圖說奇林圖魯山在綏來縣城南一百八十
里金版玉底在縣城南一百二十里卽奇林圖魯
山口水中一巨石山口內產玉向設綠玉廠三州
輯略云瑪納斯城百餘里名清水泉又西百餘里
名後溝又西百餘里名大溝皆產綠玉乾隆五十
四年封閉綠玉廠禁止開採天山北路採金之役

亦自瑪納斯始

案奇林圖魯卽奇喇圖魯庫克河一名甯家河
五鴨湖山

新疆圖說五鴨湖石山在綏來縣城東南一百二
十里

已上綏來境內支山

巴顏哈瑪爾山圖古里克河水出焉北流百里踰孔
道入於地

西域圖志巴顏哈瑪爾鄂拉在阿顏台和洛鄂拉
西五十里呼圖克拜郭勒西圖古里克郭勒東河

源發於北麓當孔道南

案圖古里克河有二源在呼圖壁城南三百里北流出三石門又北左曰鵲兒東溝右曰鵲兒西溝又北合流曰圖古里克河又西流紅山峙其西踰驛滲入於沙

格柵圖山羅克倫之水出焉

新疆圖說格柵圖山亦名騷呼達坂在昌吉縣城南八十里

昌吉鄉土志掃虎達坂在縣城南一百一十里案掃虎即騷呼縣南小山也

松山呼圖壁河水出焉北流入於羅克倫河其中多黃金

西域水道記胡圖克拜河即呼圖壁河出城南景化城中即呼圖壁八

十里之松山五源並出源處亦置金廠如羅克倫河倒河北流出山逕瑪納斯營卡倫獨山子沙磧東沙磧距景化城七十里凡北流二十五里為渠再北與羅克倫

河會

呼圖壁鄉土志松山在治南三百餘里

案新疆圖說呼圖壁河源出哈喇沙爾廳境小朱勒都斯札哈蘇達坂東流一百里至紅札金

山册二
廠折而東北流二十里入呼圖壁境此蓋就遠
源言之

呼圖壁山

呼圖壁鄉土志呼圖壁山在治南二百里

塔拉盤山

新疆圖說塔拉盤山在呼圖壁城南二百三十里
案呼圖壁城南五里和莊大渠二十里二工又
二十里頭渠又六十里石窰子自此入山又十
里草達坂又十里騷呼達坂又三十五里柵子
溝大石山又三里石梯子山又二十里石梯子

莊又五十里卽塔拉盤山也共二百三十三里
新疆圖說作一百三十里想係傳鈔之誤今改

正

阿顏台和洛山

西域圖志阿顏台和洛鄂拉在雅瑪里克鄂拉西
四十里羅克倫郭勒西當孔道南

呼圖壁鄉土志阿顏台和羅山在治南一百里

紅山

新疆圖說紅山在呼圖壁城西九十里

呼圖壁鄉土志紅山在治西八十里赭色山頂及

麓有寺東西鵲兒溝由此入

已上昌吉境內支山

新疆山脈志卷二終

